

## Dat kannst' mi glöven - Plattdeutsche Andachten

---

Montag bis Freitag, 14.15 Uhr (NDR 1 Niedersachsen)

**02. bis 06. Januar 2023 - Du büst een Gott, de mi sücht**

**Von Bernd Memenga, Prädikant aus Südbrookmerland**

Du büst een Gott, de mi sücht: So heißt die Jahreslosung für 2023 "up Platt". Bernhard Memenga, Prädikant aus Südbrookmerland in Ostfriesland freut sich, dass diese Zusage auch für das neue Jahr gilt mit all seinen Sorgen und Nöten. Und er lädt uns ein - in einem Glas kleine Zettel zu sammeln, auf denen man aufgeschrieben hat, wann man im Laufe der Monate spürt, dass man bei Gott angesehen ist.



**Bernd Memenga**

Redaktion:  
Anita Christians-Albrecht  
Pastorin und Beauftragte für Alten-  
seelsorge in der hannoverschen  
Landeskirche

Veröffentlichung:  
Evangelische Kirche im NDR  
Redaktion Hannover  
Knochenhauerstr. 38-40  
30159 Hannover  
Tel. (0511) 32 76 21  
[www.ndr.de/kirche](http://www.ndr.de/kirche)

Dieses Manuskript ist urheberrechtlich geschützt und darf nur für private Zwecke des Empfängers benutzt werden. Jede andere Verwendung (z.B. Mitteilung, Vortrag oder Aufführung in der Öffentlichkeit, Vervielfältigung, Bearbeitung, Übersetzung) ist nur mit Zustimmung der Ev. Kirche im NDR zulässig. Die Verwendung für Rundfunkzwecke bedarf der Genehmigung des NDR.

### **Maandag, 02. Januar 2023**

Van Harten een gooden nejen Johr un't Allerbest för 2023. Ik hoop, dat elk un een d'r good to in kommen is. Weer ´n Johr vörbi. Wat mag dat neje Johr woll all för uns parat holln. Wat mag dor up uns daal komen. Is d' in mien Leven all up Stee? Of moot ik wat ännern? Okay: Ik kunn'n bietjet wat ofnehmen, mi mehr bewegen. Vielleicht sull ik mi mi ok mehr Tied för mi süllst nehmen un wichtiger nehmen, wat würelk wichtig is. Seker versöök ik dat ok 2023 weer. Man ik weet nu doch al - egal, wat ik mi vörnehm - irgendwann geiht dat in de Drock van mien Olldag unner. Vielleicht nich gliek mörgen of anner Week. Man Oostern denk ik dor al heel nich mehr över nah. Un överhoopt: Zucklaa is doch so wat Leckers ... Mi up mi süllst verlaten un up dat, wat ik mi süllst mal toseggt hebb, dat is nich so einfach. Man wor ik mi up verlaten kann, is, dat ik nich alleen dör dat neje Johr gahn moot. Ik düür seker wesen, dat Gott mit mi dör de Tied geiht. Dat seggt mi dat Woord, dat mi för dat neje Johr mit up d' Padd geven word, denn dat heet för 2023: "Du büst een Gott, de mi sücht." "Disse Johr moot ik mi obber mehr um Bernd kümmern" - Nee, dat bruukt Gott sük nich vörnehmen. Un ik moot ok keen Angst hebben, dat he mi Oostern vergeten het: He is een Gott, de mi sücht!

### **Dingsdag, 03. Januar 2023**

Du büst een Gott, de mi sücht. Dit Woord ut dat Mosebook geiht mit uns dör dat neje Johr 2023. De dat seggt het, dat was een Froominschke, de to hör Tied nüms so recht wat in Reken harr: Hagar, de Maid van Abraham un Sara. Sara kunn keen Kinner kriegen un dat was schlimm för hör. In hör Noot keem se up de Idee, dat hör Maid Abrahams Kind to Welt brengen sull. Un Hagar kreeg een Jung. Man Sara kunn dor denn doch nich so good mit umgahn. Se wurr ofgünstig tegenöver hör Maid un behannel hör nich mehr alltobest. As dat tüschen de beid Froolüüd immer sturder wurr, is Hagar utreten. Se kunn nich mehr un was up't unnerst Bööntje. Man denn, middent in't Sandland – wor dat soor un wööst weer - kwamm hör de lebendig Gott tomööt. "Du büst nich alleen", seggt he an hör. "Ik laat di nich in't Verdarben lopen lett. Ik weet, wat du in't Hart un up d' Puckel dragen deist. Ok wenn anner Minschen wegkieken un dor nix van weeten willn." "Ik help di" seggt he, un dat maakt Hagar Moot. Mit blied Hart kann se ropen: Du büst een Gott, de mi sücht. In de Bibel giff dat ´n heel Bült Städen, wor man dat nahlesen kann, dat de Minschen Gott nee egal sünd Un dat gellt ok vandaag noch. Gott sücht de, de allennig sünd, de bang sünd. He sücht de, de fastsitten in hör Olldag un nich wieder weeten. De van sük süllst nix mehr verwachten sünd, de schenkt he Ankiek. He is een Gott, de uns sücht.

### **Mittweek, 04. Januar 2023**

Du büst een Gott, de mi sücht. Heet dat Wort, dat mit uns dör dat neje Johr 2023 geiht. Man elk un een weet ok, dat dat Tieden in uns Leven giff, dor föhlt sük dat heel anners an. Gott sall mi sehn? Dor mark ik nix van! Ik hebb dat nich licht mit mien Lüüd. Ik kann mien Leven nich einfach so leven, as ik dat gern wull. Ik bün krank, ik bün old, ik maak mi Sörger. Gott? Is dat würelk so? Süchst du mi? Dat höört faaktieden to uns Minschwesen de to, dat wi ehrder up dat kieken, wat nah us Meenen beter lopen muss. Wenn uns dat Dagwark good van d' Hand geiht, wenn't all good löppt, nehmen wi dat heel nich so wohr.

Ik much jo nögen, mit mi un uns Karkengemeend een Experiment to maken. Bi uns in't Kark hebben wi Olljohrsabend groot Glasen verdeelt un lüttje Zedels. Elk un een kann nu upskrieven, wor he dat in't Loop van't Johr gewohr word un spöört: "Gott is een Gott, de mi sücht" De Zedels komen in't Glas. Un wenn dat Johr to Enn geiht, denn sall mi dat mal wunnern, wovööl Zedels dor in sünd un wat dor all upsteiht. Ik ladd di in - maak doch ok mit. Wiss hest du noch 'n olln Inkooksglas rumstahn of 'n annern Backje, wor du sükse Zedels in upbewohren kannst. Ik wünsch die vör 2023 ganz vööl Ogenblicken, wor du markst: Jo! Woehrhaftig, Gott! Du süchst mi.

### **Dünnerdag, 05. Januar 2023**

Siet över 20 Johr hem wi nu al de Euro in't Knipke. Ik moot togeven, dat ik mitunner immer noch mal umreken do. Besünners denn, wenn irgendwat to düür is in mien Ogen, un dor giff dat ja in disse Tied würrrelk mennig Saken, wor man heel nich över nahdenken düürt. Van Gas un Stroom heel ofsehn, hett bold allns'n heel anner Weert kregen as noch för 'n poor Johr. As ik mit mien Froom annerletztens up d' Wiehnachtsmarkt weer, sull ik för twee Braatwursten 7 Euro betahlen: "Dat sünd 14 Mark". Mien Froom keek mi leev an: "Wi hebben ok noch Broot in Huus." "Is allns vöölst to düür", dat liggt irgendwie as 'n Schaar över de letzte Maanten un dat neje Johr 2023. Mennigeen fraggt sük: Wat sall worrn, wo geiht dat wieder? Wat good, wenn uns dor een good toproten deit: "Ok dor sittst du nich alleen mit". Wat good, dat dor een mit uns geiht, de uns sücht un helpen will. Für 2023 is uns een Woord ut dat Mosebook mit up d' Padd geven: "Du büst een Gott, de mi sücht." Dat heet nix anners, as, dat Gott ok mien Sörger sücht, sogor () mien Sörger um mien Knipke. Wenn ik nich weet, wo't wiedergahn sall. Wiel ik hum dat weert bün. 14 Mark för twee Braatwursten ... wat sall ik seggen: de hebben uns besünners lecker schmaken - up d' Wiehnachtsmarkt.

### **Freedag, 06. Januar 2023**

Is rein'n roar'n Gefühl, as Joke up't Rad stiggt un sük up d' Padd nah d' Kark maakt. Wiehnachten weer dat ja noch wat anners. Obber an so'n normalen Sönndag ...?! Up d' Parkplatz stahnt doch mehr Autos, as he docht harr. Hopentlich proot' mi nüms an, denkt he un sett' sük heel achtern in d' Kark. De een of anner Achterkopp kummt hum bekannt vör. Nahber Jan sitt up günt Sied un'n poor Riegen vör hum, dat kunn Herta woll wesen mit de grode Krullers, de unner d' Hoot wegkieken. Egal, Hauptsak, he kann hier nu einfach eben wesen uns sien Gedanken nahgahn. De Geröök is noch netso as in sien Kuffemannentied. As de Orgel anfängt, kann he merken, dat he ruhiger word. De Pastor proot' dorvan, dat Gott bi uns is, dat he uns sücht un dat wi alltied bi hum burgen sünd. Gott sücht mi? Naja, sovööl hebben wi beid ja nich mit'nanner to doon. Upmaal seggt Pastor irgendwat mit Umarmen of Handgeven und Friedensgruß för dat neje Johr. Joke will al upstahn un utnahn, as he tomaal dat Gefühl het, dat irgendwat as 'n warm Deken um hum to is. Eenigen drücken sük, anner geven sük d' Hand un seggen wat. Bold all dreihn se sük nah Joke um un nickkoppen hum frünnelk to. Up d' Padd nah Huus weih't hum de Fröst um d' Ohren, man hum is immer noch warm. Vielleicht kann he ja anner Sönndag ... eben sehn.